

少師朱襄毅公督蜀疏草

少師朱襄毅公督蜀疏草卷之一

加銜總督謝恩疏

欽差總督四川兼制湖廣荆岳鄖襄四府陝西漢中一
府軍務策應緩急督理糧餉兼巡撫四川等處地方兵
部左侍郎兼都察院右僉都御史臣朱燮元謹奏爲欽
奉勅諭恭謝天恩事天啓三年二月一十七日提塘官
葉達枝承差尹希舜齎捧勅書一道總督關防一顆至
臣於郊外跪迎入署叩頭開讀勅書內云皇帝勅諭兵

部左侍郎兼都察院右僉都御史朱熒元朕以奢安二
酋聲勢相倚據險爲難必分道進攻方可取勝茲特命
爾總督四川兼制湖廣荆岳鄖襄四府并陝西漢中一
府軍務策應緩急督理糧餉兼巡撫四川等處地方討
平藺賊一應戰守機宜悉聽便宜區畫各該撫鎮布按
都三司副叅遊守等官并所轄境內土司衛所土漢官
兵俱聽節制調度如武官有臨陣逗遛退縮僨事者總
副叅遊先取死罪招繇令其戴罪殺賊都指揮以下悉
以軍法從事卽文職中有貪酷不職阻撓軍務者四品

以上指實叅究五品以下徑自拏問其境內土司有忠順效力聽爾便宜破格獎勵如或負固恃強讐殺構亂及與逆賊通謀不法卽相機征剿毋令滋蔓事關黔省與雲貴總督同心協力彼此應援不得自分界域致悞事機合用錢糧已經戶部設處如有不敷聽於所轄地方量行支用具奏銷筭爾向者乘障保城宣力盡瘁今承茲重任當益竭新猷用成前績以副朕簡用至意欽哉故諭欽此臣自念材質極下報塞無能五內驚惶一身靡措亟欲瀝情控辭而大敵在前誼難推諉臣謹叩

頭謝恩任事原領巡撫勅書一道遵照新勅仍兼撫事
侯任滿方繳巡撫關防一顆另疏奏繳外伏念統轄專
征天地之恩彌大綿材薄植犬馬之力無多矧茲水蘭
交構之秋正值公私竝匱之日嘯山號澤虎豹正肆其
咆哮掃穴犁庭甲兵實苦於單弱旣欲綏播以搗藺必
先安夏以及苗緩則耗費日深急則撐持未定如臣碌
碌實懼不勝顧仰仗皇上之威靈用激將士之戮力賊
惡旣稔彼蒼正有定之時軍勢丕張小醜無不滅之理
七尺具在片語不欺惟是糧糗獲充庶覺師期之可定

而鄰封協濟仰煩天語之丁寧此又臣所日夜延頸以
期其濟者也天啓三年二月二十九日具奏奉聖旨知
道該部知道

奏繳巡撫關防疏

奏爲恭繳印信事天啓三年二月二十七日提塘官葉
達枝承差尹希舜齎捧欽頒總督關防一顆臣於郊外
跪迎入署安正中拜畢啓封上鑄總督四川兼制荆岳
鄖襄漢中軍務管理糧餉關防篆文四角俱全臣卽叩
頭祇領任事討賊外所有天啓二年二月初六日欽奉
頒發天字七十九號巡撫關防一顆例應奏繳天啓三
年二月二十九日具奏奉聖旨該部知道

塘報各路捷音疏

題爲塘報捷音事天啓三年正月十五日據鎮守四川
總兵官李維新監軍道四川按察司僉事劉可訓塘報
本月十一日據加銜副總范繼道報稱本日辰時叅將
羅尚文都司鄔廷高守備劉邦元至底蓬與賊接戰追
趕過河擒獲苗賊二十名馬四匹槍刀二十一件弩六
張馬絮方絮二十二牀氈衫六領僞關防一顆帶傷哨
官一名兵二十餘名同日又據成都府監紀同知段師
文塘報相同正月十六日又據李總兵劉僉事塘報本

月十三日據監軍推官胡平表報稱奉鎮道密諭於初八初九兩日燒打明灘口草延崖聯絡七營賊首阿弟敗遁當陣生擒苗賊李新林等一十一名斬獲賊級一十六顆馬二匹標槍十枝三眼銃二門腰刀十二把燒燬賊倉二十餘處俘獲男女審係降民徑行釋放本月十七日據叅將林兆鼎塘報十四日據千總羅權劉正宗百總王祥報稱本日奉令攻打下洞寨當陣斬獲首級一顆馬二匹牛二隻得獲被擄男女二口又據守備冉世烘率范德良等於十一日攻打卜昏奮攻上下兩

洞當陣斬獲一級各兵追斬首級六顆得獲馬二匹牛
五隻刀二把高招槍二枝火藥十五斤大銃一門弩四
張綿絮五件正月二十五日又據李總兵劉僉事塘報
本月十九日據監紀馬湖府知府鄭朝棟塘報據建武
領兵加銜遊擊周良材報本月十一日塘兵朱胤探得
奢賊麻老虎在杭鄉屯營積米良材同督陣官賈仁蔡
廣同馬湖統兵把總陳章等督兵分作三枝密進十二
日黎明與賊鏖戰伏兵齊喊三面受敵賊遂大敗周良
材親斬苗級一顆加銜守備黃文明何秀一各斬一顆

把總趙應吉曾定國各斬一顆哨官健兵羅成保受各
斬一顆宋胤生擒一名華兒朱成等生擒一名吳文山
阿石褒獲馬一匹把總蔡朝宗哨官李桂芳等奪獲馬
六匹長刀標槍十九枝弩一張馬湖營把總陳章等生
擒男婦四名口馬二匹麻老虎被殺一槍餘賊被傷不
計本鎮道看得周良材陳章黃文明等乃能從間設伏
乘其無備三面撲擊而擒斬累累真奇捷也等因正月
二十七日又據李總兵劉僉事塘報據守備何正光報
稱本月二十四日申時奉發督領將官鄒林等至龍透

舖應援馬湖府鄭知府報劄長寧路口卑職見得奢賊
兩路直衝杆子營事急卑職自督各將先衝逆酋後營
酋見我兵奮勇直上賊兵大敗追殺十里千總王起榮
等斬僞都司楊栗功一顆又殺僞宋守備銃打箭傷三
一餘賊二總司繼祖等獲百子銃一杆小銃二杆弩五
張花槍刷刀十一件同日又據李總兵劉僉事塘報據
馬湖府知府鄭朝棟報稱本月二十四日探得酋賊分
兵三路議定杆子兵堵竹洞水上漕馬湖兵堵下漕叅
將林兆鼎石砧土僉事冉紹文堵長寧二十五日早起

杆兵戰勝後稍却本府令叅將王懋官同守備何正光
卽撤營帶兵六千由間道赴援賊卽潰走追至賊營糧
餉營帳燒棄殆盡所獲器械無筭指揮王起榮斬獲苗
級一顆龔崇貴等斬獲苗級二顆守備冉世烘千總王
宗海冉紹文胡緯等徑進截殺賊敗追至梅子嶺焚其
營寨殺傷頗多冉紹文當陣斬功二顆冉世烘斬功一
顆本日又據監軍推官胡平表報稱二十四日探得奢
崇明父子統馬步不知其數徑至卑職武林寨營前十
里竹洞水河內外劄大小二十三營白塔山劄七營號

火徹天卑職於本日一更先令中軍將官潘映奎等十四員名發衝鋒旗手銃弩等兵二千過河登山暗伏草中次早霧散賊分五路包裹我兵分三路奮勇齊衝伏兵內外夾攻賊敗奔潰營帳盡行燒燬我兵一夜露處從晨大戰至午獲功頗多俄因傳令暫收賊復趕來我兵只得將俘斬功級丟下轉戰被傷十數人我兵各路掃營接應旗手周萬諒殺死白綾甲賊將一名馬兵哭叫主子殺了上前將萬諒刺了兩槍奪去又潘映奎同總旗手陳益殺死銀甲賊一名卽時監軍道援兵先至

徑過龍透鋪堵截監軍鄭知府林叅將龍冉等漢土官兵各奮勇接殺賊始大敗奔逃天晚收兵丟棄之功多所斬獲雖少然狂鋒已挫除將俘斬功級查明另報外又將陸續撥山捕獲姦細指揮林登寅至明灘口拏獲楊友貴程悌張用胡從義守備潘濟美部下塘兵拏獲雷一明指揮李承宗部下塘兵蔣興撥山拏獲童兒加銜都司楊有功兵伏奇拏獲趙義守備潘濟美塘兵拏獲奢賊僞百總張太陳啓法守備胡舜等拏獲陳宗啓共十名解報前來二月二十九日據監軍道僉事劉可

訓塘報爲飛報大捷事二十八日巳時據保寧府監軍
推官胡平表報稱二十七日辰時逆賊奢崇明奢寅領
賊兵數萬共六枝一由卑職武林寨中漕衝後營一由
右嶺下衝右營一由左嶺下衝左營一由三江過渡登
左後嶺劄梁一枝欲過渡從左營後包裹一由龍透鋪
牽制馬湖林冉等兵使不得救應奢寅披青氍騎白鼻
烏馬親下左嶺督兵過河衝犯左營四路一齊大戰交
鋒自辰至申五箇時候銃打箭傷賊死無數不肯退步
卑職只得躬環介冑與寅對敵呼天拚命挺槍出營率

領將士易三桂李國選唐受劉大宗余權中余美等過河衝鋒將士旗兵望見卑職皆墮淚死戰奢寅大敗追殺上嶺殺死馬步賊并奪馬甚多後營中軍潘映奎領守備袁戎將士旗兵等過河交戰大勝追殺數里右營守備陳坤領精兵過河交戰大勝後漕將士譚弘道胡雲鳳曾遐中等領兵追過三江截殺大勝寔逆賊反叛以來第一場大戰也皆仰賴威名不損一兵一將萬全大勝也殺死馬賊無數不知逆寅性命在否然賊兵膽落魂銷我師忠勇愈奮除生擒偽監軍李楫等并官兵

俘斬功級奪獲器械馬匹俟查明解報合先塘報同日
又據監軍推官胡平表塘報相同本日又據監紀馬湖
府知府鄭朝棟報稱逆賊於二十七日六路來犯龍透
武林卑職與胡推官林叅將等營各各分布力戰賊自
石笋進兵馬建兩營兵自寅時對敵至未時仗本部院
威靈斬獲首級二十一顆生擒十六名被銃箭傷死者
不計其數得獲賊馬六十匹衣甲刀槍四十餘件卑職
又單率兵將追殺十里至黃葛鋪衆賊奔逃而去甫晚
勒兵回營乃賊抄長寧小路出其不意已圍龍安之營

職復與馬建兵攻逐追退勢屬全勝合行飛報三月初一日又據總兵李維新塘報相同又據監軍道報守備袁可成當陣獲四川總兵官關防一顆二月三十日又據監軍道塘報本月二十八日加街遊擊舒遐報稱督同把總范興旺領兵追趕逆賊僞都司湯文臣至仙鷺洞敵殺卑職親斬一顆楊三槐陳春林趙雄共斬馬兵一顆家丁舒童斬級一顆乘勝又追至水車壩又戰楊三槐陳春林等又斬一顆舒遐親斬一顆趙雄嚴登范興旺王守陽共斬一顆俘獲大小婦女七名口花槍二

校白杆槍二十三枝大小弩十一張長刀七把飛標五
枝氍衫二領馬一匹等因塘報此長寧一路之功也正
月二十日據李總兵監軍紀功分巡川北道叅政閔夢
得叙馬瀘兵備道副使李仙品塘報本月十七日據叅
軍劉養鯤守備張學周將官何繼光朱朝聘塘報本日
卯時據都司范祖文報稱天啓二年十月內暗遣守備
羅奇杰指揮滿應宸持兩道牌劄前往白沙密約樊虎
營中僞叅將丁世先血決十二月二十九日復差二人
間道接取於正月十六日丁世先攜兵二百餘人同妻

子至趙霸投順建功該鎮道看得丁世先年貌魁梧不在宋張之下除給賞銀牌安插等因二月初七日又據李總兵塘報本月初二日發納谿兵六千前鋒哨探初四日午時官兵盡行渡江初五日戌時據中軍盧世卿稟報據加銜遊擊王思堯等十三員率兵至白崖坵截殺賊兵本夜五鼓遇賊坐路對敵銃砲打死奢賊數十王思堯王耀李上進劉諧各斬功一顆楊應岳斬功二顆槍刀馬絮腦包十三件其餘未割首級我兵帶傷四名又據監紀閔叅政李副使坐營劉宗良都司周朝佐

各塘報相同二月初九日據總兵李維新塘報據中軍
盧世卿稟據督陣官金珊李法塘報二月初五日酉時
標營百總陳登高等督兵至羅乾溪與賊對敵當陣斬
獲苗級六顆二月十五日據李總兵監紀閔叅政李副
使塘報據叅軍劉養胤守備張學周贊畫黑茂何繼光
朱朝聘報稱令將官鄢一价鄢一傳等領兵於本月初
十日黎明直衝黑狗坪賊寨三營殺賊數百餘人奉令
不敢割級止生擒僞都司姚俸才大苗目樊繼盛汪世
崇劉琦王同五名內姚俸才樊繼盛大喊不行斬級解

驗賊馬一匹賊營放火燒燬千總喻釗分兵衝劫賊首
萬祥一營斬殺苗兵四十餘人止割三級生擒一名解
道臬示訖同日又據李總兵與監軍二道塘報大兵於
二月十八日五鼓已取象嶺去永寧甚近因逆賊糾合
諸苗於二十一日四面攻圍我兵奔退被傷不多查實
另報等情以上納谿一路之功也正月十四日據李總
兵監紀兵巡下川南道右叅政王世仁兵巡上川東道
副使徐如珂塘報據仁懷路督陣指揮楊元報稱正月
初九日戌時據加銜副總兵羅乾象後營遊擊孫逢聖

塘報本日午時蒙分布將官周宸范鉞璩國玉等三十員名領兵八千分作三路至小關子葫蘆溪悶頭箐殺賊斬獲苗級三百顆獲馬一百餘匹刀槍器械不計其數獲功查明另報二月十五日又據李總兵王右叅政徐副使塘報本月初十日據副總薛來衍叅將鄒蔚然報稱初八日天明差旗鼓郭思正督兵令洪綱招降阿富陳大全等攻羅書成後圍殺傷賊百餘斬苗級三顆獲馬二匹長槍三枝絮三牀投降一十八家其男婦百餘口二月二十二日據兵巡下南道王右叅政塘報據

監紀同知劉鼎新報稱本月十六日據小關把隘守備
王元第郭定魯報稱十二日逆賊阿九引兵來攻箐壩
督兵百戶黃榮吉提調徐茂爵截殺一陣部兵李成第
李宏業等斬功三顆加銜指揮王懿下兵王國奇等斬
功二顆指揮易元亨陳聘學各部下兵斬功三顆生擒
逆賊一名石應收監理合塘報二月二十二日又據李
總兵王右叅政徐副使塘報爲戰復土城獲功大捷事
本月十九日准加銜副總羅乾象手本報稱十五日子
時分兵袁登王國禎等領兵抄路埋伏土城之左遊軫

袁勲孫逢聖等領兵埋伏土城之右乾象親督大兵直至觀音崖叛賊羅向宸扶國頑阿金等三路迎敵守備譚正修等官二十五員分路奮勇大戰銃砲齊發打死三十餘賊兩處伏兵齊出斬苗級二百餘顆督陣指揮楊元親斬壯苗一顆追至儒溪河邊落水死者千餘僞總兵九朝旺淹死賊將乾象第三子僅三歲殺死周宸等兵用銃打死五六十人奪獲大小船三十七隻器械槍刀不計已戰復土城除查驗造冊另報外合先飛報同日又據督陣官楊元周宸各報相同二月二十六日

據兵巡下川南道王右叅政兵巡上川東道徐副使塘報本月十四日據加銜都司僉書王元第郭定魯十二日哨得僞叅將阿九統兵劄營土城河岸地名箐壩約同王繼先出奇斬賊首阿九部衆共二十四顆生擒二名二月二十二日據二道塘報逆寅於本月十七日天明率羿子徑衝石子山馬邦瑞士兵奔逃薛來衍被圍殺出損兵一百三十名邦瑞被擄等因以上仁合一路之功也二月初二日據監紀督餉遵義道四川按察司僉事趙邦清塘報本年正月二十一日准副總秦衍祚

手本報稱奉本道密令發守備龔自明羅廷孝等統兵前鋒偵探堵截正月初七日據龔自明報稱蘭賊扶國頑領兵數千拒占遵義府城又於府後創立大營西賊游朝炳楊維新鄭應顯等領兵數千於龍山寺屯劄五營又於總府後山創三營爲犄角之勢本府會同叅將侯良柱大犒三軍卽於本日發加銜都司劉登第同龔自明等兵一千前鋒趙一傑文在茲王文學兵三千名慣熟火器弓弩手數百各令捲甲劉登第等兵暗伏後川陳心得兵四百伏白田壩本府親領河南家兵百餘

馬步弓弩三千直攻扶國禎大營各受計訖本月十一日丑時分本府親督攻城萬銃齊發火磚飛煌直貫國禎大營國禎踰牆潰走陳心得見號火領兵截至獅子橋劉登第領兵後川殺出游朝炳楊維新鄭應顯等見國禎敗走各偷路潰圍而逃侯叅將忼發守備陳獻廷等領馬步銃手夾擊當陣斬獲僞叅將鄭應明僞都司游朝帝抹賽阿烏受等死級四十顆生擒男婦十名口戰馬四匹苗槍副刀弓弩共十五件追至中莊收兵招撫流移塘報到道本月二十二日又准叅將侯良柱報

稱發守備陳獻廷等領馬步銃手三千員名多帶火器
傳令捲甲夤夜進發初十日夜先發精兵七百名暗伏
教場兩頭接應我兵從龍山寺後路直上連發火器賊
衆驚潰首尾夾攻斬獲扶賊抹賽阿虎僞都司劉蛟等
竝苗級四十五顆生擒僞指揮陳信等二十一人戰馬
五匹大弩二十一架長槍二十八枝絮二十牀賊營盡
行燒燬追殺至中莊見賊遠遠喊聲應援不敢遠追仍
於府城內外多張營伍仍於龍山寺後劄營固守一面
招安百姓看得府城今雖恢復但內地空虛糧餉不繼

恐孤軍難以久守合行飛報正月十八日又准副總秦
衍祚手本據標下守備董國忠報稱本月初七日發祁
文通弟祁文仕百總蔣應貴領兵三十行至花秋坪偵
探安鑾抹賽吳鑾在彼招兵欲隨奢寅途中偶遇祁文
仕生擒吳鑾斬高招李塘軒死功一顆又獲賊婦三口
長刀一把等情據此爲照本道奉檄恢復遵搗蘭多方招
撫遂將大頭目羅安良趙國璽雷應乾陳加興陳朝殿
王守玉趙祥任朝龍何銘等相繼來歸前後約四千五
百餘衆屢移秦侯二將乘機恢復遵義真新春奇功本

道業已訂期以本月二十七日移沈副總由點脚壩進落紅口秦副總侯叅將進安羅二村其取古蘭其拏獲叛賊吳鑾體貌甚是強梁恐其逸走當卽梟斬訖正月二十一日又拏獲奢寅僞遊擊袁衣錦係元帥袁衣繡胞弟天啓元年十一月內犯搶綦江縣卽衣繡弟兄攜人妻女被害趙文棟等認寔隨將衣錦梟示除前項功級查驗明白另報外合先塘報二月初五日又據監紀遵義道趙僉事塘報正月二十六日午時准副總秦衍祚報稱本月二十三日酉時本府方收兵入遵義城忽

報中莊一帶賊兵復至急令千總袁加勤羅起高等領兵前去截殺至宅門頭接戰當陣斬獲首級二十二顆賊始奔逃二月二十五日據監軍遵義道趙僉事塘報本月初七日據都司周朝陞報稱奉令領兵至大小二岡偵探賊首李貴於初五日率兵數百拒敵卑職卽同張文斗千總何鎮等督兵大戰斬獲首級三十五顆賊首陳茂先又據侯叅將招降前來理合塘報同日又據遵義道趙僉事塘報爲撫剿成功首獲元兇事二月十八日酉時准叅將侯良柱報稱卑職屢奉本道密札切

切以招撫奢寅以大頭目安鑾楊守江卽金寶官兒爲
第一義近者奉使安鑾心交僧人了相等三次密勸安
鑾歸投卑職奉令搗剿竊見羅村隔拒大河安鑾爲一
方巨寇故卑職惓惓招撫期剪奢酋右臂十二日奢富
領兵數千至孫蓋壩各援兵未到卑職孤軍獨立勁敵
在前誠恐衆心解體賊衆乘虛隨用叅謀胡來賓等畫
策兵家有沉舟破釜之計置之死地而後生遂於當夜
殺坐騎馬四匹會集三軍羅拜歃盟措需犒賞枵腹之
衆踴躍歡呼願決死戰卽先發守備李承文張興榮火

攻手一百名先於亭子山頭埋伏十四日寅時發守備
陳金倫等引步兵誘敵且戰且走火器大發賊知有計
不敢深追我兵乘勝掩殺斬獲僞遊擊者抹長官江五
抹賽牟大旺等賊首十二級除另冊開報卽差旗牌楊
應芳前去暗誘安鑾心腹大管事劉崇德親管羅加旺
張大旺等前來投見卑職密諭厚賞以結其心發回勸
化安鑾彼見奢富潰敗向順之念愈堅隨即暗約卑職
助兵挾取妻子渠料卑職未必發兵亦藉以窺我虛實
卑職深察此意一面令羅安良進陶安灘以牽賊勢一

面點選精兵舍人侯國藩侯忠等七百員名多帶火器
渡河溷同安鑾步兵於十五日夜徑抵楊黃三寨銃砲
震天賊不知我兵多少扶國禎帶兵先走餘衆倒戈叫
降安鑾當將妾石氏子安在嵩盡數撤回并黃楊三寨
及重戴二堤偽都司盧江等計五千餘口即日渡河早
職先令多兵劄河接渡賞安鑾子安在嵩紅段一端三
兩銀牌一面冠帶一副卽與黃傘簪插二兩銀花鼓樂
迎獎其餘目把逐一厚賞其安鑾之子及偽官盧江盧
淮趙興朝劉崇德羅加旺唐忠韓富黃永堅趙廷富韓

興鄧明才蔡成榮姜榮余四嚴桂山王才令其前來投
見本道據安鑾稱奢富扶國禎止兵三千願作鄉導引
官兵攻取立功等語卑職謂彼初投不宜擅令立功權
令隨營以收全捷奢富等酋可計日而得也俟事就之
日卽令安鑾并前獲陳茂先同來投見伏乞轉報等因
到道該本道看得自受事以來日夜欲剪除奢酋黨羽
必招大頭目然後可潰衆叛賊之心使知各各回頭東
邊趙國璽等王守玉安鑾楊守江卽金寶官兄前趙國
璽羅安良等四千餘衆旣投降矣所慮者惟安鑾渠魁

顧多方支吾不肯過河本道差加銜都司羅安良田應
斗等復差僧人了相又差加銜都司李棟同綦江省祭
安鑾兒女親家喻文富幾番前去招撫安鑾昨聞本道
發副總秦衍祚侯良柱至安羅二村而安鑾嫡妻王氏
親筆稟帖於本道求饒他一家千口性命今接侯良柱
塘報安鑾率家五千餘口過河投見而侯良柱卽行賞
賚寵之以黃傘榮之以冠帶今安鑾來歸扶國禎楊守
江趙國璧指日可望奢寅只在目前授首矣理合塘報
又據李總兵塘報相同二月二十七日又據監軍僉事

盧安世副總沈崇極塘報已取落紅口招過羅華羅用七十二洞苗民見在約會泰羅二將之兵進討古蘭等情以上遵義一路之功也各等因到臣看得官兵四面環集計擒斬之功千餘爲數頗多而逆賊四出衝突披猖之勢猶熾獨長寧兩次大勝與取土城落紅招徠安羅卜昏諸洞足以剪羽翼而寒賊膽但近日黔中撫剿之局未定諸土司搖拽有推奢氏爲盟主之說者故二酋猙獰之狀雖屢愈張官兵單弱之處間有不利且京帑楚帑望眼將穿而漢土各兵告餉日急遵義殘疆無

米接濟卽有羈縻之策恨無雨粟之供此一事又臣所
深爲隱憂也獲功兵將重加獎賞鼓舞失事官兵行令
戴罪討賊外理合具題伏乞勅下兵部立案賊平一體
查叙施行天啓三年三月初二日具題奉聖旨兵部知
道

縣令給由疏略

題爲遵例考覈給由官員事據四川布政使司呈奉臣
批據南川縣申准本縣知縣韓應龍關稱湖廣襄陽府
光化縣人由舉人云云蓬溪縣申准本縣知縣倪叅化
關稱湖廣五開衛籍直隸揚州府江都縣人由舉人云
云梁山縣申准本縣知縣周惟軫關稱廣西南寧府宣
化縣人由舉人云云威遠縣申准本縣知縣董養中關
稱雲南大理府太和縣人由舉人云云昭化縣申准本
縣知縣鄭之良關稱湖廣黃州府黃岡縣人由舉人云

云該臣查得威遠縣知縣董養中曾經被賊駁回查議
隨據布政司回稱行據嘉定州申稱查得奢酋圍省犯
縣本官防禦擒斬頗多及縣被殘旋卽恢復功冊見敘
先奉總督張侍郎憲牌查州縣各官如倉庫無恙禦剿
有功免其失守准令給由已經遵照外該縣印信倉庫
獄囚一一俱存立有功勞例應給由又該本司查得威
遠彈丸之地嬰守日久斬獲多功衆寡不敵本官幾隕
控弦追剿恢復倉庫無恙金湯依然捐俸助餉功足掩
過所當免議又梁山縣知縣周惟軫奉委綏輯盜紀以

致月日稽遲原係公務別無規避俱應准其給由准吏部咨云云等因俱題奉欽依移咨通行在卷今據前因該臣會同巡按四川監察御史張論考覈得南川縣知縣韓應龍操持峻潔才具疏通字民痛癢關心戡亂妖氛絕跡蓬溪縣知縣倪參化丰格軒昂精神瑩朗聲調力祛害馬撫綏能集哀鴻梁山縣知縣周惟軫忠厚宅心端詳莅事展措庭無積案撫摩野有餘膏威遠縣知縣董養中豈弟宜民端嚴集事保障不辭鋒鏑撫字常寓催科昭化縣知縣鄭之良才情宣朗行履端凝催科

民樂輸將整飭吏無欺隱各官職業俱脩考居稱職除
批令帶俸管事董養中前後歷任與韓應龍倪參化周
惟軫鄭之良各任內行過事蹟徑自造冊差人齎繳五
事冊揭行令咨送部院外內韓應龍地近苗巢當賊發
難白蓮邪黨稱王建閣附和橫行本官同典史集兵剿
芟數日廓清兼復綦江厥功最著雖加運司仍當照品
以部屬行取倪參化緝拏姦細應酬土兵獨撐山城保
障最苦募兵一千五百復委督毛兵取渝功蹟在卷况
其潔已愛民頌聲洋溢應破格加陞以示勸酬周惟軫

因委真安監軍督餉見歷艱險以致給由月日稽遲原
無他故理合具題伏乞勅下吏部將知縣韓應龍倪參
化周惟軫董養中鄭之良再加考覈酌議題覆旨行天
啓三年三月初二日具題奉聖旨吏部知道

加銜被羈張同知并補員缺疏

題爲府官借道被羈仗義不屈仰祈照例陞擢併議推
補員缺以固疆圉事臣屬遵義府同知張起鶚自到任
以來清白裋躬精詳蒞事採木完報獨蚤署府廢墜俱
修蓋卓然方正之品經濟之才也先是督兵赴援旣殫
萬里之勞回任借才遂有嘉定之委是時蜀中妖教繁
興而該州特甚本官一受事卽設法招安擒厥渠魁散
其黨羽合郡翕然神君與慈母竝頌迨棘闈事畢忽報
該府知府杜天培物故本官不得不回遵義以管府事

矣奈州印甫交大難頓發水陸二途登時梗絕在全軀
護妻子之徒畏禍遷延藉口無路何處不可自全而本
官獨慷慨激烈奮不顧身謂夜郎一角之天實全川半
壁之障不固播無以制藺不請黔援無以遏狂鋒遂假
道鎮雄匍匐而入畢節欲效哭秦救楚之忠爲去韓走
魏之計此何等擔當也不謂水西諸目把狐兔協謀豺
狼肆毒陽爲好言堅留不放又怪其勁氣剛顏不肯依
阿供應則日薄一日居處則日遠一日漸至鳥獸與處
口腹不充濱於死者數矣臣初訪問全無下落屢詢鎮

雄始以實報所差叙人黃騰高僞爲苗玆至西溪地方
親見本官衣衫藍縷意氣如常惟曰見危授命更何言
哉求其書而不搦管問之言而不開口蓋既有委命之
達襟亦存防姦之深意也臣誼在同舟無計相援每望
蚤出具疏揄揚乃今事機未偶阻絕日長不敢不據實
上聞夫聖恩浩蕩匹夫未有向隅獨此一臣懷忠被羈
經年未返耿耿一念可與日月爭光其幸而歸則疾風
之勁草也卽有意外亦全節之勞臣也伏望皇上垂憐
勅下吏部卽依資俸特陞四川按察司副使之銜以俟

生全之日議缺填補使起鶚聞之知幽谷重陰尚披天
日而遐方異域俱頌聖明西顧無隱不照益以鼓勞臣
而激義士矣其同知員缺正在干戈搶攘之際不容乏
人行據四川布政司回稱原任彭縣知縣今陞臨安府
同知冉峯才利盤錯守砥冰霜展其蘊可以解繩買犢
移之近更爲就熟駕輕張起鶚伏節遐方義不顧身當
從厚議而新疆悠悠無宰應急將本官改補起鶚員缺
以固地方等因到臣該臣會同巡按四川監察御史張
論覆查得遵義新疆殘破已甚非良有司不能料理而

非就近移改亦難望其依期受事同知冉崧素有得民之譽兼著禦賊之勞就近改易最爲得人伏乞併勅吏部覆議上請將張起鶚加陞副使職銜冉崧卽補前缺遺下雲南臨安府同知員缺另行銓補俾仗節之臣知有感佩而殘疆事務不致廢弛所裨益匪淺矣天啓三年三月初二日具題奉聖旨吏部知道該本部覆奉聖旨是

請補副總中軍疏

題爲請補中軍官員以資征剿事臣本書生未諳軍旅頃蒙皇上授以總督四川兼制秦楚鄰邑專討藺賊靖安蜀土責任綦重敢不黽勉拮据惟力是視顧逆賊構結鄰苗招用苗獍五路斷險百計作奸官兵非不屢捷而銀米每苦不敷負隅之勢彌兇燎原之焰尚熾查得各邊總督與先臣李化龍奉旨討賊標下置兵三千設有副總中軍一員主傳宣號令遊擊二員操練兵士分投策應今方臨敵征討資糧匱乏亦不敢濫用名器留

兵幕下惟是臣身在行間一切傳宣號令催督將士惟中軍官是賴而新推中軍遊擊吳世重日久未到大敵在前用人爲急查得原任中軍官今陞松潘叅將管副總兵事魯美中沉雄慷慨廉靖安貞解圍已樹偉功應務確饒成筭雖到新任尚未離局業經督臣薦敘原係優陞之列合無卽以本官陞副總兵管標下中軍事務庶轉移間不必借才理合題請伏乞勅下兵部再加酌議將魯美中加陞副總兵管中軍事遺下松潘員缺另行推補吳世重俟到蜀查缺咨用覆議上請行臣衙門

遵照庶事有責成天啓三年三月初二日具題奉聖旨
兵部知道該本部覆議以叅將管副總中軍事奉聖旨
是

遵義道勅被焚請給疏

題爲道臣勅書被焚乞賜查給以明事權事據遵義兵
巡監軍督餉道四川按察司僉事趙邦清呈稱本道於
天啓二年十一月二十五日前去桐梓監軍就近恢復
遵義擒剿逆酋進抵水崖山頂劄營俱係就地草蓋營
房千間節次拏獲姦細供稱奢寅惟憾趙監軍忽於天
啓三年正月初七日夜四鼓被姦細從本道自住營房
外面放火本道家人梁進才知覺大叫驚起方出營房
四面皆火僅以身免風猛火焰障天軍器衣服戰馬登

時燬盡其火藥鉛彈幸收土庫未曾焚燒原領勅書與本道一應卷案項刻灰燼止存印信並無損壞但火起深夜情出不測所有勅書例應具題頒給等因呈詳到臣該臣會同巡按四川監察御史張論查得遵義道僉事趙邦清奉委監軍結營草莽姦細放火變生意外然勅書大事人臣所當慎重而昏夜火發一時卒難點檢情在可原相應具題伏乞勅下該部查照該道職掌撰擬勅書一道頒發臣衙門轉給本官收領討賊天啓三年三月初二日具題奉聖旨該部知道

揭報改留余同知守重慶

爲議改勤苦清官以撫地方以慰衆望事據兵巡上川
東道副使徐如珂呈奉本部院批據重慶府巴縣兩學
生員錢嗣起李有寶牟鍾英胡來賓劉世澤鄢恆毅吳
顯烈程先登錢夢周蹇超之錢夢益汪慶霖羅太宇劉
遠翔劉世禧胡聖臣黃世清等呈前事竊惟渝城天塹
夙號雄都苗賊犬狴突成奇變刀頭濺頸血不問義士
仁人城上現熒神盡爲墟丘瓦礫散離赤子望祖父母
之卵翼皇皇殘喘子遺賴良有司之撫摩岌岌本府余

同知衷可履水質鬼守嚴四知目以迎刃遊虛金從百
鍊昔曾佐郡二年德政銘心今幸字渝一路福星載道
提兵賊壘佛圖之中勇擎天督陣南坪字水之衝鋒震
地及視郡邑之篆偏生月骨之春藏庫盡空心計獨煩
好手郵傳都廢區畫每費良工望之如雲一時廬舍俱
就澄之若水六曹狐社潛消脩隍鑿池理屯葺堡風清
弊絕僵起危安鑑別妍媸用壯青衿之氣公行賞罰隱
禡奸黨之魂華衮共斧鉞齊彰善政與仁心並出何期
凋憊得此神明前聞檄令督兵板轅孔亟茲見剡遲擢

典藉冠彌殷仰惟太宗師在上埋輪著績才能必貯於
藥籠攬轡澄清湯火諒需於良牧倘二十封一日少此
同知良莠奸生嗟倒懸而誰解若二千石斯時借以太
守民安地習忻化瑟而謳吟卽其數載之勤勞克堪憲
司之起擢願從階晉俱借渝留庶久破之城永叨慈庇
卽大宗師之慈庇新痊之衆得終帡幪卽大宗師之帡
幪起等身沐其恩不能不口楊其美等情奉批仰兵巡
上川東道查報奉此又奉本部院批據重慶府巴縣兩
學廩增附生員楊瑄王文輝安爲畢賈襄之王文星胡

來輔等呈爲爲國爲民保留清正以濟時艱事渝城自
岨虎有負敢作赤睂之奸遂池魚俱殃竟成白骨之慘
迨奏我師之績始復漢官之儀然百二之雉已虛誰傳
九門之寒漏故尋常之燕無主空起萬井之亂煙幽巷
肢骸半夜偶語寒市瓦礫白日橫堆已成殘廢之區容
有拊楯之策荷本府余同知一絲不染半壁爲撐二十
提封運若臂指之便億萬生齒置於衽席之安逃遁遍
相招徠方無別井離鄉之苦煨燼曲加寧輯得遂除堦
理砌之歡推心置腹中知雨露之有日以手加額上幸

枯槁之復榮且饋運不支而措置多方推空釜難炊毀
然於朝三暮四之外兼士作繼至而調停有法卽悍僕
莫御帖然於東來西往之間苗民之偵探盡收影絕秦
宮之狗梅使之經過無苦聲隨月店之雞重關之控正
雄兩河之巡不絕練戶口以坐作之法強於鋤耰付胥
役以啓閉之司壯於鼓角四方鼓舞一城熙寧五袴堪
歌尚謂廉來之慕北門爲守惟期寇借之長向或令監
軍便覺手足無措今惟使守土真成父母相依伏蒙大
宗師威振中外德被蒼黎鑒赤子之愚情允黃堂之專

請勿謂代割有在應生改弦更轍之虞亦以終局可稽
但視淪肌入髓之化則二天之賜全從栢府爲求而再
世之逢自是杏壇有色等情奉批仰巡上東道查報奉
此又奉本部院批據巴縣八十里民胡煒倪達等呈爲
保留清苦才能以救倒懸以靖地方事渝城自遭賊變
以來死亡枕藉流離在道重以師旅饑饉相繼頻仍派
餉徵兵屢見疊出且鄉村被焚兵士兵之害耕牛穀種
俱空郡城當咸陽一火之慘六家小屋皆燼驛遍倒站
糧冊去籍冤鬼夜號逃民星散且奢酋未殲奸細時出

地方捭抗人心蠢動渝且岌岌乎危矣幸本府余同知
天賦忠勇人凜孤貞清屯百十餘分每年計錢糧七千
賦贖纖毫無染每月去火耗數百至於識遠於未變之
先設城梁壯渝城之險勤王於旣變之後督秦兵扼佛
圖之關一聞旌節到渝遂令旄倪安堵迨署篆務益著
勞辛獨臂支府縣之劇一身任軍民之責晝夜兼巡心
力俱苦且申飭保甲督練鄉兵設法處軍士之餉幾近
萬餘多方置守陴之兵不止千計拮据群務二十州邑
盜同春藹整肅兵戎土漢客兵不犯秋毫至於設處各

驛夫馬清查近郭拋荒賑恤死亾撫綏流殍未易更僕
其他衙舍冷若緇僧操守澹如秋水擔當可赴湯火正
直真泣鬼神道路自有口碑祖臺自有神鑑一聞監軍
檄至舉國皇皇如失怙恃伏蒙憲臺題請闔府百姓喜
若更生恨難赴闕力爲催請第百姓至微君門至遠非
仰藉祖臺再爲催請豈能肉白骨之民起瘡痍之色哉
合詞上請伏惟俯體輿情或題留府職或加銜憲司庶
借本官一口之寇卽貽萬姓一日之安生靈幸甚地方
幸甚等情奉批仰巡上東道併查報奉此又奉本部院

批據巴縣耆民楊孟餘張觀魁等訴爲乞推廉能以安
地方事重慶古稱易治比遭賊變定安最難幸賴本府
余同知招集遺民疏通商旅剔除奸細懲治亂黨脩理
官舍分布民居補葺城垣派守險隘備械守攻召兵行
住錢糧不給則勸民樂輸夫馬逃亾則多方設濟撫傷
殘如診脈祛毒害猶切膚積靡欺乎上司事盡彰夫民
視乞賜表揚俯從民望等情又據朝天驛馬戶汪啓渭
王朝用等訴爲懇恩特奏清廉守郡事渝富衝要二十
年來兵荒運餉疲困備極余同知分署數載清白之操

仁慈之政八十里恪遵化理二十封咸與維新人人有
父母之呼在在抱青天之頌懇乞特爲保奏撫守渝城
庶赤子有托元氣復完萬代公侯叩天三祝等情俱奉
批仰兵巡上川東道併查報奉此該本道副使徐如珂
看得二守余新民之大有造於渝也渝人士不啻家戶
而戶祝之矣而本道總而名之曰真天地爲昭金石可
貫是爲真心格高彝鼎價重瑚璉是爲真品瞬息千里
揮斤八極是爲真才強禦不畏威武不屈是爲真力量
宇宙在手造化生心是爲真經濟以故署邑則邑治署

府則府治署成都則成都治而出其緒餘以陳師鞠旅則又無不治有臣若此卽遺大投艱端有賴焉而區區二千石豈足以竟其施哉蓋渝人士之引領而望其卽真也久矣前歲題而不允猶爲俸未及期今歲覆而不補實爲民失其望此自鄉紳孝廉文學士庶以致輿隸廝養無不求得之以長撫此渝也而本官方引以爲愧避以爲嫌至欲稱疾求去本官固不難敝屣一官而地方則何可一日無此官哉似宜俯順民情再申前請必使真正循良久於其位而後已若謂朝議已定新守有

人則或援近日事例加以監司職銜俾之監軍督餉而猶恐六年之循吏百瘁之勞臣不宜止酬以僉事銜也等因呈詳到職卷查先該職題知縣趙民戴改安岳縣一疏奉聖旨趙民戴准留用該省兵事方急各官有就近更置留任的聽撫按官便宜行一面具奏事平照舊該部知道欽此隨行五路監軍各道再加揀擇酌議另行題請外看得設官原以安民而在大亂之後招徠綏輯尤非容易同知余新民清白剛方素稱鐵漢何嘗買名沽譽而士民愛戴若赤子之依慈母喧呼載道不能

沮遏者蓋緣平時之廉正素得人心難後之調劑悉中
款繁近日調兵進剿悉取道渝城本官獨力主持不令
侵擾尤民情之所依歸公論之所推戴也況其在圍百
日備殫守禦之勞二郎先登遂成破竹之勢尤功績之
彰彰在人者近題陞本府亦是循資緣以馬湖府知府
鄭朝棟奉旨改補重慶雲南大理府知府鄭繁改補馬
湖遂未允從但渝民日日赴愬情不獲已馬湖知府鄭
朝棟見督士兵長寧討賊四土司相依如命決不肯捨
而朝棟亦願竭力搗剿堅不赴任一爲治兵一爲治民

當此倉皇紛擾之地關係匪細不敢辭瑣賾而悞地方
合揭本部煩將余新民仍陞補重慶府知府撫民催餉
鄭朝棟仍管馬湖治兵討賊俱候叙功加陞監司鄭榮
卽改四川龍安知府旣已慰士民之望且以結討賊之
局地方幸甚天啓三年三月初二日揭報吏部院科

塘報緝獲真正首惡王道達等

爲緝獲真正逆黨事天啓二年十一月初九日據兵巡
上川東道四川按察司副使徐如珂呈報據標下加街
守備王元第拿獲僞叅將王道達解道批行重慶府署
印清軍余同知審得王道達係九姓長官司生員領兵
援遼教場行兇守本府出奇門充僞叅將職銜其姪王
化每與千總沈應龍等約爲內應道達殺訖城復之日
道達隱姓名濶入散兵投降王元第營中安插真安州
逆酋詭計非真降可比向成都攻北門據薛來衍兵斬

首者係王道大此犯方真是道達應依律正法解報到
道本道看得僞官王道達其爲害於渝城非一日矣本
道用間用購百計以致之而不可得不意溷於降兵中
幾乎逸去莫可踪跡也幸王元第覺而縛之此正樊籠
張彤親信用事之人罪不在諸叛黨下者似應與緝獲
張彤之子張鳴鳳牢固監候一併獻俘等因本年二月
二十三日又據重慶府署印清軍同知余新民申報本
年九月二十一日據巴縣耆民羅孝東首稱五月二十
五日渝城恢復本縣逆民毛宗榮向住遵義今回重慶

帶出苗子楊鳴鳳等背負行李寅夜至縣民劉攀榮家
窩藏隱匿四箇月今查楊鳴鳳係賊首張彤親子改名
易姓衆口紛紛首乞正法隨拏鳴鳳李大毛宗攀到府
審據楊鳴鳳供稱係賊首張彤第二子隨彤在城原聘
生員袁師古女爲婚議聘儀三千兩絹段三疋城復之
日銀絹官兵盡搶此其的據李大係內江縣人原住遵
義亦被毛宗榮帶出窩藏各情是實等因各招詳呈報
到職除輕罪人犯批行發落外看得王道達張鳴鳳原
係有名首惡逸而復獲知天網不容大愆逋漏省城斬

者既係道大則道達與鳴鳳併當監候待擒獲奢崇明
父子一同獻俘以俟藁銜天啓三年三月初二日塘報
兵部科

乞恩改給封典疏

奏爲比例陳情乞恩改給誥命事臣一介草茅濫叨隆
遇自起家大理寺評事迄陞蘇州府知府兩次考滿臣
父母及臣妻竝叨恩典迨陞廣東提學叅政洊歷四川
布政司左布政使兩遇覃恩榮及三代臣之遭際甚厚
而涯分已踰矣茲者復蒙皇上晉臣貳樞畀以節鉞視
前秩更加而臣源本之思更有不容已者查得大明會
典一款萬曆元年題准京堂官先任方面二品已領誥
命後歷京官三品考滿者許以京銜改給臣於天啓二

年十月初十日奉旨加陞兵部右侍郎又查本年十月二十八日該吏部題爲奉旨申明覃恩定制事奉聖旨是這覃恩期限既經申明著自本年十月終旬停止凡內外各官引用恩詔及年遠請乞的槩不准行在外本章通政司不得封進欽此臣奉命之日原在覃恩未靳之先實與例符竊惟樂莫大於榮親恩莫高於累錫臣父璘年踰八旬相去萬里久違菽水之養獲邀錫予之恩直草野之奇榮爲天倫之樂事臣祖以京雖不生受亦得遠追九原有知更當踴躍臣卽捐糜何足爲報天

地之大未嘗靳於用恩犬馬所希亦旣邀有成格謹瀝
情悃干冒宸嚴伏望聖慈俯允勅下吏部將臣祖臣父
查照新銜改給應得誥命仰戴高厚曷有窮期臣不勝
激切懇禱之至天啓三年三月初十日具奏奉聖旨准
改給吏部知道

縣令給由疏略

題爲遵例考覈給由官員事據四川布政使司呈奉臣
批據華陽縣申准本縣知縣王洪關稱湖廣黃州府蘄
州人由進士云云呈乞照例會題并開具稱職考語起
送到臣該臣會同巡按四川監察御史張論考覈得華
陽縣知縣王琪英齡老識粹履宏才絃歌化洽言游保
障功高尹鐸本官職業俱脩考居稱職除批令帶俸管
事任內行過事蹟徑自造冊差人齎繳五事冊揭行令
咨送部院外近准吏部咨該山東撫按題該本部覆議

順天等府十一州縣及永平所屬各州縣准筭邊俸凡
歷俸二年准作三年山東登萊二府州縣正官并四川
貴州雲南廣西及偏沅一帶附近貴州者俱筭邊俸仍
行撫按查明報部等因隨行布按兩司查明另報外今
查知縣王洪邁賊之難身兼兩縣事務器具無不取辦
戰守備效辛勤及查緝姦細調劑軍民皆井井有條人
人歡洽載道口碑有不可掩者近接邸報見部覆鉅野
縣知縣趙延慶及大名府推官陳世竣亦以捍城有功
比照題准新例行取入京仰見皇上重封疆而勸賢吏

德意良厚今王珙歷俸三年應比照邊俸三年准作四年之例亟應行取考選優擢庶清華可慶得人而勞臣益有激勸矣理合具題伏乞勅下吏部將知縣王珙再加考覈酌議題覆施行天啓三年三月初十日具題奉聖旨吏部知道該本部覆議行取奉聖旨是

糾叅攘功道臣疏

題爲道臣昧心攘功塗面攫利據實糾叅以伸公道事
臣惟程勞課伐國有明章掠美竊貲世所共憤乃有無
勞而攘首功設局以網厚利如原任四川按察司兵巡
下川東道僉事今陞叅政戴君恩其人者廉隅盡喪物
論沸騰臣與按臣固皇上所命以飭紀綱明是非者也
誼難緘默謹畧一剖折焉夫曩者重慶之復仰賴皇上
威靈腥穢畢洗天地重開督臣張我續實主調度按臣
張論實主監理文武諸將吏黽勉共事詎曰無功顧論

其大較自副使丘志充督毛兵西兵直攻佛圖各官兵助之戮屍成坑而賊之項領斷實功也副使盧瑛田等各率精銳以迎周鼎赴援之寇二萬人無有還者實功也副使徐如珂徒步起義自前歲十一月卽糾集金富廉等分門堵截屢屢血戰雖佛圖奪而復失賊竟不敢掠於三十里之外實功也此外勞人瘁士尚難更僕寸長片善自宜畢收卽君恩礫礫因人成事督臣亦槩爲查敘獨是洋洋然自誇招降一節臣實不解夫招降者必賊勢猖熾我力單微乘隙用間誘令解散卽臣亦何

常不爲此計若夫聚師十萬合圍半年敗鼓之皮煮醬
俱盡接濟一斷斗米千金此時須招乎不須招乎賊如
樊龍張彤可降乎不可降乎爲君恩者儻能約會諸將
吏發誓盟天各抽精銳一鼓而登仍令之曰殺苗爲功
殃民必罪卽未一一無恙而所全者尚多奈何借公衆
營私圖向白日作暗事家人有何親故屢遣入城縋堞
悉係餓殍豈云奇貨旣携兩賊登舟何又縱之復入以
十萬人苦攻惡戰眈眈睥睨者而欲獨納之懷袖遂致
衆怒陡發逆體支分萬炬齊紅滿城立燼試問君恩是

招降也生致二賊獻之闕下乎倉庫無恙乎連雲密構
留得一椽乎哭女啼兒救得數命乎薛來胤已被斫一
刀身獨倖而得脫輒避險局攘美差臣已大薄其爲人
矣今蒙皇上不待勘議立晉三階小臣隆遇實所稀有
乃陛辭數月優游不前忽於三月初九日具稟到臣云
湖廣容美宣撫司土官田楚產勃勃技癢求臣發檄調
之赴援仍自任荆澧之間括餉以給夫君恩豈不知蜀
方用兵又豈不知土兵難用秦良玉素負忠義咫尺忠
州調之必半年始至況於遠在洞庭湘水之南風馬牛

不相及者哉蓋其營營一念旣得顯名益思厚實從前
土漢所饋僕壻所攫猶以爲江海一泓未滿所欲臣若
不量而與之櫟今而後子姪姻親俱可將帥安家衣甲
隨意花銷倚土官以爲市括四郡以爲囊借題高坐如
向者援成都各將故事蜀幸而勝則曰來意甚善費不
可追蜀不幸而不勝則曰不該躁進原當待我其疏所
云三十幅共一轂當其亡有車之用埏埴以爲器當其
無有器之用非常之人爲非常之業蓋正指此又云先
發帑金三十萬轉臣等半年之需而復假以便宜使得

爲所欲爲寬以文墨使得竟所欲竟一腔心事業已盡
獻矣嗟嗟蜀之兵饑民困朝不謀夕監司自林宰以下
或轉運艱難心血竝嘔或迎敵指麾家難罔顧累月經
年不敢告勞而獨君恩不說一實語不作一實事名利
必欲兼攘是非任其顛倒計得氣張遂哆口而欺皇上
藐撫按一則曰臣等二則曰臣等後薪反上捷徑偏饒
安能令勞臣不解體而戰士不灰心哉若其治邑賦穢
口吻猶喧告逆遊移鬚眉盡剪躍冶敗羣自以爲至巧
臣實嘆其愚也伏祈皇上勅下吏部亟議褫斥或降用

別省以維一線公道其於危疆不直小補矣天啓二年
三月初十日具題奉聖旨該部知道

黎州土官襲替疏

題爲地方事據四川按察司呈奉臣批據分守上川南
道呈據雅州申奉本道信牌奉臣批據嘉定州儒學訓
導今陞雲南永昌府保山縣儒學教諭周師望係大渡
河所人呈稱卑職邊鄙草茅謬叨今職家本武流兄襲
祖役十世受國宏恩九代服官守禦先因本所土官瞿
馬爭構改土削爵卷案可查未敢贅具近以苗酋叛亂
土官安氏爲彼姻親屢次助逆殺機露於藏匿奢兵與
打造槍箭逆形見於燒燬官店與追殺土民於天啓二

年九月二十五日調集山後西番與七枝苗兵意在攻城直犯榮雅幸有李遊擊多方捍禦不致猖獗卑職禍切同室救急纓冠思得馬氏之中向化效順者惟一呬什卽今所舉土舍馬應乾乃先馬應龍胞弟自萬曆二十九年隨安氏出穴管理地方安氏徒具虛位應乾實有功地方昔以苗俗上蒸其嫂今以忠順大義滅親乃因諫阻逆謀安氏不從其言遂至割恩絕不相見退居松坪地方去本所六日山行俱皆攀藤附葛卑職間行同千總詹長直抵松坪穴中多方化諭先蒙守道陳叅

政賞有字匾高義可嘉與花紅等件應乾懷此恩德卽聚通族舍人六十餘人與本處苗人千餘同伊胞兄義勿軟血盟誓舉順逐逆衆口一詞願得應乾爲主比應乾一至富林營衆苗俱皆左袒而西番卽各散去卑職嚴詞諭令隨從安氏苗民不許仍前助惡當將安氏逐至媽箐山聽候命令隨將應乾帶至本所於十月十五日通所土庶耆民人等漢苗共二千餘人軟血共保應乾管理地方次日應乾卽行木刻插豎各寨去後隨據馬族舍人各寨耆宿投具保結立案申聞闔所通議前

有降授土千戶印信見貯雅州庫中原案俟馬氏真正
土官方授今應乾係衆苗推立漢苗傾心非比乘機要
挾而衆苗觀望亦在印信若印信一給則衆苗知有其
主馬氏亦甘心效力矣但安氏謀爲不軌罪在不赦若
貸以不死乞照瞿氏故事逐出榮經縣黑麻溪幽住似
爲長便若不逐安氏則馬安之讐不深蘭酋不無望援
久之又恐再生他虞卑職雖夏蟲腐鼠每念含沙填海
應乾乃窮骨寒竄第恐有司牽於文移謂土官爲奇貨
可居以印信爲香餌可漁生一疑難之心則卑職不死

於短刺之苗則死於舞文之手且卑職私心自誓恥與
兇惡同天又何辭肝腦塗地然一家何惜一命何惜但
誤地方以誤國事不小也儻賜施行惟乞憲檄差官監
押卑職至本所取具闔所結狀職今叨轉雲南敎諭亦
不敢遠去願與應乾共保二年三年地方無事以待大
破蘭酋方敢別委如東元三哈又係別項事件與此大
同舉立各別二犯宥則同宥罰則同罰若罪以未減罰
其軍器各百餘副亦足以助軍需第應乾得立此不過
一檄而定耳此係邊方苗情重務事理豈是病狂喪心

希名干進自取誅戮等因奉批仰守巡上川南道會同
建昌道速查議報奉此備移巡上南道并建昌道會議
外又據雅州申奉本道信牌蒙巡按四川監察張御史
批據雅黎遊擊李毓華呈爲舉忠順消逆謀以副苗望
以靖地方事據大渡河守禦千戶所申據本所鄉官士
監生員周愷李場陳良玉劉繼武周師望曹堂宁王文
翰黎之俊唐之亮黎之傑許忠國唐之愈萬文曹堂守
曹堂璧曹鎬郝聯貞曹銓朱九鼎張玉唐之儀劉啟陞
李思泌等連名呈稱本所土官原設安撫司副使先年

瞿氏繼夫馬祥管印晚年聽奸鼓惑謀欲以瞿易馬致土舍馬應龍稱兵爭襲圍城倡亂奉旨勘斷追去安撫司印信將瞿氏逐出榮經縣削應龍以土千戶職銜管理下七枝地方尋請改授土千戶印信一顆未給應龍身故其子馬新壽亦故安氏繼夫承立比議若將印給安氏恐蹈瞿氏往轍向貯雅庫俟馬氏子侄承襲方行給掌安氏管理多年功過相準近因奢崇明娶伊次女情聯骨肉助叛情真去年賊逼省城氏亦欲圖本所賴苗人多半歸服嫡派土舍馬呷什卽今更名馬應乾多

方駕馭陰謀乃阻今復假以給改土民東元千總之故
於地名深溪陰養奸賊數人糾聚番猺數百聲言於本
年十月初四日破城長驅爲奢外援且布張告示安申
文移背叛之言滿紙有據蒙李遊擊諳賊情形點集在
城軍兵清理十甲牌於九月二十五日赴教場捐金犒
勞分布防守差官點齊蠻莊井各鄉屯鄉勇千餘於漢
源街劄營備禦嚴飭各營兵目申文建昌道請援調取
雅所官軍赴用威聲大振苗方落膽當此之時苟非本
府運籌多筭預爲之待本所上下協心蕞爾沉黎不知

何狀目今大張天討奢賊固知進無能爲第恐計窮之
際地與安氏相通退而依爲黎邊之害似可虞也復蒙
本府差旗牌張朝鼎千總詹長所差旗軍何惠於地名
松坪喚出應乾責令協保地方隨據馬氏族衆目把耆
宿馬義勿等老幼相率赴所沿門懇告口稱安氏謀叛
與馬氏無干誠恐禍成壞伊爵土累伊身家情願舉順
去逆保立應乾管理地方等情本所官士軍民鄉耆人
等於本月十五日齊赴土主廟與馬氏族長馬義勿舍
人巴路陸撒脚歪阿交耆宿賈出馬國然阿迫陸保長

哥脚撒通把朱慎蘭友枝白聘簡土民張友成郭應舉
等僉議俱同義勿又稱應乾是我胞弟馬深是我生子
深雖派當繼襲奈何癱瘓待死深子年方八歲難以任
事今日四境歸心通族推戴惟一應乾耳後應乾年老
深子成人自當替襲無煩再議馬義勿并各舍人目把
自認木刻甘結在卷訖竊念安氏爲謀不軌姑息終爲
邊患殄除必煩致討不若立一馬姓則苗衆歸主窘才
獨婦更復何爲土司立官惟防爭論今旣議出本宗衆
口一詞可無他慮夫以漢官武職年至六十卽當告替

矧安氏年近七十昏亂老嫗豈宜久養爲禍呈乞備達
院道俯察下情允從輿論查照舊案循馬氏承立給印
之議授應乾以土官之職則馬氏存歿快心矢忠報國
黎邊享太平之福奢賊絕肩臂之望矣據此又據闔所
旗軍詹長劉妙成頂汪斯王馬兒小張何惠宋貴三羅
艾輕等五百名訴爲懇電逆謀俯勵忠順以明賞罰以
靖地方事竊照黎州安撫司自始設立土官鈐束諸寨
番苗後因瞿馬爭變土舍馬應龍誘苗圍城削職降印
改爲土千戶職銜印信一顆應龍與子馬新壽相繼身

故未經襲任將印信解雅貯庫立應龍妻安氏以妻繼夫權更名馬之良管理地方今經數載因叛逆奢酋娶安氏之女爲妾豈氏不思國朝王法只爲姻親私念於去年妄生暗逆不意洩漏自懼誅戮逃遁深溪避罪今又聽奸撥弄擅兵圍城謀占改土地方雖事未成情已顯露幸有原隨本官協理親派土舍馬應乾頗知忠順勤理地方各寨番苗畏服今闔所土庶鄉耆見地方攘亂皆欲保舉幸蒙牌喚本族同派各支土舍耆宿目把馬義勿馬撒哥保元朱慎野馬他等恐安氏生釁累絕

馬氏爵土願立應乾爲官管理地方但查雖有先保應襲馬深已成癱瘓不能承襲深生有子幼弱欲待成人竊慮地方多事難以久停應俟成人替襲訴懇俯將應乾備達允給印信鈐制番徠庶地方有所責成軍民鄉村不遭塗炭據此又據耆民商旅富莊鄉勇徐榮陳國胤祝上策張南川等三百名訴爲懇恩備達允靖地方以明賞罰事竊照黎州安撫司自始設立土官鈐束諸寨番苗後因瞿馬爭變削職降印改爲土千戶職銜印信一顆比因土舍馬應龍父子俱亡議將龍妻安氏爲

官更名馬之良管理地方看係女官故將印信解雅州
貯庫俟馬氏子孫承襲之日方給掌管經今數載不料
奢酋叛逆豈氏不思王法因與奢酋姻親於去冬妄言
暗逆今又聽奸撥舞擅兵圍城挾占改土地方事雖未
成情已顯露逃避深溪幸有親派土舍馬應乾素有忠
順勤幹地方各寨番苗畏服今奉喚出應乾同派土舍
各枝耆宿目把馬義勿馬撒哥野馬他朱慎蘭友枝郭
應舉等恐絕馬氏爵土意願應乾爲官管理地方雖有
陰襲馬深已成癰瘡不能承襲深子幼稚訴乞俯將應

乾備達允印鈐制番徠庶地方有所責成鄉村軍民不
遭塗炭等情又據土舍馬義勿具結投稱遵奉結得土
官安氏管理數年年老不便鈐束番徠有義勿所生嫡
男阿的更名馬深先承襲文案在卷今男得染癰瘰之
災難以承襲具結本所伏乞轉申院司請給印信情願
保舉胞弟馬呷什更名馬應乾出寨付掌管理地方仍
接姪孫撫養讀書竝無爭競中間不致虛冒又據各枝
土舍巴路陸撒脚歪阿交苗宿等通把白聘簡等衆結
稱土官馬之良年老不便料理具結本所轉申院司請

給印信付與應乾以便鈐束番徠據此又據下七枝苗宿阿迺陸保阿咱谷七五咀咱阿弟野馬他等結稱因主安氏管理數載年老不便料理衆苗人等情願保舉土舍馬應乾出寨管理地方結狀投所轉請給印付應乾束苗中間不致虛冒等情各投到所該本所掌印指揮潘嗣美看係舉保管理地方重務苗情事理卑所未敢專擅擬合申稟裁奪等因具申到職該卑職詳閱所申事關爵土干係匪輕遽難轉詳隨批據申馬應乾是否親枝馬深有無殘廢將來深子長成如何接替務要

一一申說明白以杜後日爭擾仰掌印官會集通所於公署并取馬氏宗圖倫序確由速報以便轉詳隨據復申該本所遵奉差千總詹長前去著落土司通把舍餘耆苗人等查勘隨據土舍馬義勿等回稱因土官馬之良年老姻親奢崇明叛逆聽讒畏罪避躲深溪地方無人管理三家通把各寨番苗切慮無主鈐束誠恐有壞地方罪責匪細緣義勿之子阿的更名馬深繼襲報文在卷但馬深於四十六年內得染癰瘰眼目殘廢難以動履我弟馬應乾實係馬深一派親枝忠順向上頗知

王法義勿之子既不能承襲情願將官職付與胞弟馬應乾借襲承管地方深子桂哥年方八歲付應乾撫養成人教習讀書候應乾終身交與桂哥承襲今義勿會同本族舍人耆宿巴路等公議明白已後再無爭競之故第今地方多事通所官監生員耆老鄉民人等以馬應乾平素忠順舉保喚出請給印信管理保固地方稍賴清寧已取各土舍耆苗通把書識土民人等甘結投所在卷今奉行查理合回報伏乞俯從備達庶地方得以安靖等情據此該本所掌印指揮潘嗣美會集通所

士夫耆庶軍民重覆公議今馬義勿亟稱馬應乾實係
親支胞弟保舉借襲管理地方接撫深子桂哥成人還
職承襲果無異言矣比據馬應乾投遞俟深子成人還
襲結狀二紙在卷及弔馬族宗圖倫序查驗委係馬義
勿一派親支今奉批查擬合同報等因由詳到職該卑
職看得土舍襲授先以親支爲據然後於衆族公舉將
來統攝各苗庶無後患向年馬應龍父子物故已蒙會
勘僉定馬義勿之子馬深襲替彼深幼小恐不能約束
卽將安氏繼之故更名馬之良俟深長成之日方給印

信卷案昭然豈知本婦管理日久愈加恣肆其年雖衰邁不堪而叛形屢有的據弟應乾每見舉動卽爲力阻是亦苗人中之畏法者以致馬姓親族及通郡士民慮恐害及身家所以合詞保舉應乾而義勿又赴該所呈稱親男馬深癰瘰難痊深子年方八歲應乾乃同胞親弟則乾今日之借職若權以代深深子異日長成仍以繼乾且義勿應乾各書有借還甘結業已明悉土舍之舉用乃渠族樂從士庶一口儻蒙俯准輿情則奸黨自爾潛消腹心之患可杜矣由詳蒙批守上南道查報蒙

此牌行邛雅二州會查馬應乾是否馬氏親支馬深果
否癰瘰桂哥果否幼小馬義勿借襲與應乾果否出於
意願借還甘結果否可據使二比後來不生嫌隙作事
謀始况關借襲事情該州務須從長酌議確報施行奉
此該本州併案備行邛州前來同本州親詣榮經縣移
會遊府取獲馬義勿馬呷什等併大所保結一千人證
到官該邛州知州吳燮雅州知州吳伯錡會同雅黎遊
擊李毓華會看得大所之保舉呷什也逃稽土官襲替
一稟於宗圖嫡長世傳所從來矣嫡長子孫有故則及

嫡次子孫嫡次子孫有故始及庶房子孫以馬氏圖按之馬應龍故絕已定馬義勿之子馬深有成案矣深中道殘痼而親子桂哥幼未成丁呷什卽義勿之親弟馬深之親叔非疎遠旁支也明甚義勿自供子方旦夕就木孫又胎髮未燥官印久懸不無有覬覦者願暫與呷什彼此誓有口血而呷什亦願立桂哥爲子俟終身之後卽與原職付桂哥可無煩更端是彼此自爲計乃情理之必然者况老婦耄避於密箐狡夸蓄毒於相嶺屬苗觀望於肘腋此地此時可一日而無管攝乎與其官

缺而起爭印塵而不予孰若從該所士民之請順苗裔
調停之權夫以馬氏之官還馬氏之子旣以昭彼之倫
序顯以酬有勞之人陰以消反側之禍且足廣我之恩
威合無請授呷什千戶職員管束苗人頒印之日仍取
大所首舉一二士民親結不致唆異別情自後彼疆此
界一遵萬曆二十四年明旨則世篤忠貞而邊圉荷寧
謐矣等因會詳到道該本道看得襲職一事蓋難言之
矣襲職固難借襲尤難借襲於世襲固難而借襲於土
苗尤難之又難始事之初激於一時意氣借者願借還

者認還始未嘗不慨然也迫借於人者事權旣屬則中
情頗熱遂有久假不歸之意而借人者把柄不操則炎
涼動念隨悔從前輕諾之非二比旣生嫌疑奸徒遂多
唆擺始起口舌之爭尋致干戈之鬪此西南土苗之大
槩也馬應乾借襲一事馬深旣已病廢應候伊子桂哥
出幼承襲此自正理今據詳宗枝之接派桂哥親祖馬
義勿之願借與馬應乾之認還其詳具載該遊與邛雅
兩州會勘之詞本道再四覆酌應乾胞弟原非遠支一
可借頗知忠順應加風勵二可借苗心歸附聽其鈐束

三可借寢土婦不軌之謀消諸苗觀望之志四可借其中喫緊一節又在應乾無子卽願立桂哥爲子自今日而言以應乾而借桂哥之官職自後日而論卽以桂哥而繼應乾之宗祧祖孫父子無嫌無怨此其上也卽日後應乾生子而桂哥之接襲如故借者襲者兩不相妨雖後事杳不可知而據稱目前已各有借還甘結該所士民合詞爲應乾請命卽云念切身家此急則治標之計揆之時勢大率如此旣經兩州會同該遊申詳前來欲候建昌道議覆會詳誠恐地方戒嚴之日土苗生事

以刁措借口合無請授呷什土千戶職員給領雅州貯庫印信令其管束苗人但借襲事關重大請乞批行按察司覆查詳奪等因由詳奉批馬應乾以親弟借襲且立幼侄爲嗣用以束苗守邊勝衰殘叵測之婦遠矣仰按察司速議詳報奉此又奉本部院批據分巡上川南道呈爲舉忠順消逆謀以副苗望以靖地方事奉本部院批據雅黎李遊擊呈據大渡河守禦千戶所申稱本所鄉官士監生員周愷等并軍民鄉耆人等齊赴土主廟與馬義勿及舍人巴路陸撒等通把朱慎等會議前

情相同義勿稱應乾係伊胞弟馬深是伊生子奈何癱
瘓待死難承深子年方八歲不能任事今衆苗歸心通
族推戴惟一應乾後應乾年終深子桂哥成人自當還
襲馬義勿并各舍人目把自認木刻甘結在卷等因由
詳奉批仰按察司併議速報奉此該本司署印吳副使
看得土司繼襲之法有二首依倫序次順人心倫序正
則挨次繼立此其常也若時值其變漢法已窮彼中擁
戴有人勢難膠柱而我且因之以爲利所謂以不治治
之也馬祥故絕土婦暫管司事序當立馬義勿之子馬

深而深不幸癰瘰矣馬深病廢序當立深子桂哥而桂哥幼稚不能壓服苗人矣安氏避入深山苗目渙無統領小相嶺一帶地方道路爲梗安得不早爲之計據詳馬應乾爲義勿親弟義勿情願借襲應乾無子復以桂哥爲子異日願還在今日則該所無主而有主在異日則義勿無官而有官又况應乾輸誠於我苗人歸心應乾惟恐一日不得爲主是彼之自爲計甚悉而我之爲彼計亦更無他策該道所稱四可借蓋亦深察彼我之情形熟籌時勢之緩急因其勢而利導之耳至於後來

事體不能逆料而此際所憑借還有結士民有呈勘問
有案只合如是止矣旣經勘問詳悉無容更議合無將
呷什請授土千戶給以印信嚴行管束苗人通我建昌
道路俟應乾終身桂哥長成之日仍令襲替不得久假
不歸等因呈詳到臣該臣會同巡按四川監察御史張
論看得黎州土官馬應龍故後無子立其妻安氏改名
馬之良管束各苗從苗俗也之良有女嫁奢崇明爲小
妻嬖而生事逆謀實其贊成前歲事發遣心腹數百人
陸續赴黎與之良會約而之良徑占住黎將衙門與先

年征建昌崇明所留目把黃光輝密謀起事臣在圍城適黎州百戶魏民望赴援卽令其部卒葉高僞爲之良差人徑投賊營賊初索信云被官兵搶奪賊賞銀一錠止傳口語葉高出而復還曰攜銀則身且不保安能通信賊笑曰我欲殺汝謂汝詐也今信矣遂發僞勅一道併書一通徑發之良黃光輝始識其相通情狀遂密行分巡上川南道副使趙日亨先用計斬黃光輝而之良遂遁歸及江門失事之良復得志糾集各苗借言激變蠢蠢欲動中間通信而默制之馬應乾之力實居多焉

應乾係應龍同胞次弟尚有兄馬義勿之子馬深於序
應襲久患癱症不能起而應乾又無子以馬深子桂哥
爲子則於名極順而於情極協馬氏一族欲杜妖婦之
貽累地方居民又恐兵燹之流毒公舉應乾之襲衆口
一詞且以正名分而杜釁隙更有裨益焉旣經三覆會
議明白相應具題伏乞勅下兵部覆議上請合無准令
馬應乾承襲兄馬應龍土千戶之職行臣衙門轉行司
道給印管理地方應乾終身之後方令桂哥替襲庶建
南道路得以寧謐而於疆圉事體藉以廓清矣天啓三

年三月初十日具題奉聖旨兵部知道該本部覆奉聖旨馬應乾准就彼借襲本內錯寫名字著改正行